



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

INDEKS PENGELUARAN PERINDUSTRIAN, MALAYSIA APRIL 2025

Pengeluaran sektor Pembuatan meningkat 5.6 peratus, memacu pertumbuhan Indeks Pengeluaran Perindustrian pada April 2025

PUTRAJAYA, 11 Jun 2025 – Indeks Pengeluaran Perindustrian merekodkan pertumbuhan 2.7 peratus pada April 2025. Jabatan Perangkaan Malaysia melaporkan dalam keluaran **Indeks Pengeluaran Perindustrian (IPP), Malaysia, April 2025** pada hari ini. Penerbitan ini memaparkan statistik IPP yang terdiri daripada tiga sektor iaitu Perlombongan, Pembuatan dan Elektrik.

Menurut Ketua Perangkawan Malaysia, Dato' Sri Dr. Mohd Uzir Mahidin, "IPP meningkat sebanyak 2.7 peratus pada April 2025, disumbangkan oleh pertumbuhan dalam sektor Pembuatan sebanyak 5.6 peratus. Sebaliknya, sektor Perlombongan dan Elektrik masing-masing menyusut 6.3 peratus dan 1.6 peratus."

Dalam sektor Pembuatan, industri berorientasikan eksport pada April 2025 terus meningkat sebanyak 6.4 peratus, selepas mencatatkan peningkatan 4.8 peratus pada bulan sebelumnya. Prestasi ini didokong terutamanya oleh Pembuatan minyak dan lemak daripada sayuran dan haiwan yang mencatatkan pertumbuhan dua angka sebanyak 22.8 peratus, dan semakin disokong oleh Pembuatan komputer, produk elektronik dan optikal (11.1%). Bagi perbandingan bulan ke bulan, industri berorientasikan eksport menurun 10.2 peratus (Mac 2025: 10.1%).

Begitu juga, industri berorientasikan domestik berkembang 3.9 peratus pada April 2025, selepas pertumbuhan 2.3 peratus direkodkan pada Mac 2025. Momentum

positif ini disumbangkan oleh Pembuatan produk prosesan makanan (8.2%); Pembuatan produk logam yang direka, kecuali mesin dan kelengkapan (5.0%); dan Pembuatan logam asas (6.0%). Berbanding bulan sebelumnya, industri berorientasikan domestik menaik 0.3 peratus.

Mengulas mengenai prestasi sektor Perlombongan, Dato' Sri Dr. Mohd Uzir Mahidin berkata, “Penyusutan 6.3 peratus dalam sektor Perlombongan pada April 2025 didorong oleh pengurangan dalam pengeluaran bagi Gas Asli dan Petroleum Mentah & Kondensat, masing – masing sebanyak 10.0 peratus dan 0.7 peratus. Berasaskan bulan ke bulan, indeks Perlombongan susut sebanyak 13.9 peratus, berbanding pertumbuhan 17.8 peratus yang direkodkan pada Mac 2025.”

Sementara itu, indeks Elektrik mencatatkan penurunan sebanyak 1.6 peratus pada April 2025, bertambah baik daripada penyusutan 2.2 peratus yang direkodkan pada bulan sebelumnya. Berbanding Mac 2025, indeks Elektrik menurun 3.1 peratus.

Di peringkat global, IPP bagi kebanyakan negara menunjukkan trend peningkatan pada April 2025, dengan kenaikan kukuh tahun ke tahun yang dicatatkan oleh Taiwan (22.3%) dan Vietnam (10.2%). Kenaikan yang sederhana juga dapat dilihat di negara-negara seperti China (6.1%), Singapura (5.9%), Korea Selatan (4.9%), Thailand (2.2%), Amerika Syarikat (1.5%) dan Jepun (0.7%) bagi April 2025.

Merumuskan prestasi IPP bagi tempoh Januari sehingga April 2025, Ketua Perangkawan berkata, “IPP meningkat sebanyak 2.4 peratus berbanding tempoh yang sama pada tahun lalu (Januari – April 2024: 3.6%). Sepanjang tempoh tersebut, sektor Pembuatan merekodkan pengembangan 4.5 peratus, manakala sektor Perlombongan dan sektor Elektrik menyusut, masing-masing dengan 4.0 peratus dan 1.7 peratus.”


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.


Malaysia buat julung kalinya telah menduduki tangga pertama (1) di peringkat global dalam laporan dwi-tahunan Open Data Inventory (ODIN) 2024/25 yang dikeluarkan oleh Open Data Watch (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema 'Driving Change with Quality Statistics and Data for Everyone'.


OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Carta 1: Indeks Pengeluaran Perindustrian, Malaysia, April 2024 – April 2025







**Carta 3: Pertumbuhan Indeks Pembuatan Mengikut Subsektor, Malaysia
Mac 2025 dan April 2025**



Carta 4: Indeks Pembuatan Mengikut Industri Berorientasikan Eksport dan Domestik, Malaysia, April 2024 - April 2025




Carta 5: Pembuatan Berorientasikan Eksport Mengikut Kumpulan, Malaysia, Mac 2025 dan April 2025



Carta 6: Pembuatan Berorientasikan Domestik Mengikut Kumpulan, Malaysia,

Mac 2025 dan April 2025



Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
11 JUN 2025